

Na osnovu člana 108. Zakona o odgoju i obrazovanju u osnovnoj i srednjoj školi u Kantonu Sarajevo („Službene novine Kantona Sarajevo“ br. 27/24) i člana 14. stav (3) Pravilnika o izboru, razrješenju, nadležnostima i načinu rada školskog odbora osnovne škole, srednje škole, srednjoškolskog i školskog centra na području Kantona Sarajevo („Službene novine Kantona Sarajevo“ br. 46/24 i 5/25), Školski odbor JU „Treća osnovna škola“ Ilidža na sjednici održanoj dana 30.03.2026. godine, d o n o s i

POSLOVNIK

O RADU ŠKOLSKOG ODBORA

DIO PRVI. OPĆE ODREDBE (1)

Član 1.

(Predmet Poslovnika)

- (1) Poslovníkom školskog odbora JU „Treća osnovna škola“ Ilidža (u daljem tekstu: Poslovnik) utvrđuje se: način rada školskog odbora, opće metode djelovanja članova i predsjednika školskog odbora i druga pitanja koja se odnose na aktivnosti školskog odbora u skladu sa zakonom.
- (2) Odredbe ovog Poslovnika obavezne su za sve članove školskog odbora i druga lica koja prisustvuju sjednicama.
- (3) Terminološko korištenje muškog ili ženskog roda u ovom poslovniku podrazumijeva uključivanje oba roda.

Član 2.

(Pravni osnov)

Školski odbor kao organ upravljanja JU „Treća osnovna škola“ Ilidža (u daljem tekstu: Škola) organizuje se i radi u skladu sa Zakonom o odgoju i obrazovanju u osnovnoj i srednjoj školi u Kantonu Sarajevo (u daljem tekstu: Zakon), Pravilima JU „Treća osnovna škola“ Ilidža i Pravilnikom o izboru, razrješenju, nadležnostima i načinu rada školskog odbora osnovne škole, srednje škole, srednjoškolskog i školskog centra na području Kantona Sarajevo.

Član 3.

(Primjena Poslovnika)

- (1) Ako neko pitanje koje je značajno za funkcionisanje školskog odbora i njegovih radnih tijela nije regulisano ovim Poslovníkom, regulisat će se zaključkom školskog odbora u skladu sa Zakonom.
- (2) Odredbe ovog Poslovnika primjenjuju se i u radu radnih tijela koje imenuje školski odbor.

DIO DRUGI. PRAVA I DUŽNOSTI ČLANOVA ŠKOLSKOG ODBORA

Član 4.

(Sticanje prava i dužnosti)

Prava i dužnosti članova školskog odbora stiču se izborom i imenovanjem članova školskog odbora od strane Vlade Kantona Sarajevo po postupku propisanom zakonom i podzakonskim aktima.

Član 5.

(Sastav školskog odbora)

- (1) Školski odbor se sastoji od 4 člana čiji se izbor i imenovanje vrši u skladu sa Zakonom, Pravilima škole i Pravilnikom o izboru, razrješenju, nadležnostima i načinu rada školskog odbora osnovne škole, srednje škole, srednjoškolskog i školskog centra na području Kantona Sarajevo, koji donosi Ministar za odgoj i obrazovanje Kantona Sarajevo.
- (2) Školski odbor imenuje se na mandatni period od četiri (4) godine sa mogućnošću jednog reizbora u istom školskom odboru bez obzira na strukturu, a mandat članova teče od dana konstituisanja školskog odbora.
- (3) Ako u toku mandata član školskog odbora iz bilo kojeg razloga bude razriješen članstva ili mu prestane mandat zastupanja određene strukture, školski odbor odmah, pokreće hitnu procedure popune, odnosno zamjene članova školskog odbora upražnjene pozicije, tražeći od odgovarajuće strukture da dostave prijedlog kandidata u roku od 15 dana.
- (4) Izbor za vršioca dužnosti člana školskog odbora provodi se po proceduri utvrđenoj Pravilnikom o izboru, razrješenju, nadležnostima i načinu rada školskog odbora osnovne škole, srednje škole, srednjoškolskog i školskog centra na području Kantona Sarajevo.
- (5) Školski odbor na prvoj (konstituirajućoj) sjednici vrši izbor zamjenika predsjednika školskog odbora.

Član 6.

(Prava i dužnosti članova)

- (1) Članovi školskog odbora mogu djelovati samo kao kolektivni organ i nemaju nadležnost za donošenje odluka van sjednica školskog odbora.
- (2) Član školskog odbora ima pravo i obavezu prisustvovati sjednicama školskog odbora i sjednicama radnih tijela čiji je član i učestvovati u radu i odlučivanju.
- (3) Član školskog odbora je dužan izvršavati zadatke koje mu, u okviru svog djelokruga povjeri školski odbor ili radno tijelo čiji je član.
- (4) Član školskog odbora ima pravo podnositi nacрте i prijedloge akata i pokretati inicijative i druga pitanja iz djelokruga rada školskog odbora.
- (5) Obavljanje dužnosti člana školskog odbora je dobrovoljno i bez naknade.

Član 7.

(Spriječenost prisustva sjednici)

- (1) Član školskog odbora koji je spriječen da prisustvuje sjednici školskog odbora ili radnog tijela ili iz određenih razloga treba u toku rada da napusti sjednicu, dužan je o tome blagovremeno obavijestiti predsjednika školskog odbora, odnosno predsjednika radnog tijela čiji je član i iznijeti razloge zbog kojih odsustvuje.

(2) U slučaju nedolaska člana školskog odbora na najmanje tri uzastopne sjednice, na kojima se razmatra ista tačka dnevnog reda, školski odbor pokreće inicijativu za smjenu tog člana.

Član 8.

(Ostavka)

Član školskog odbora može podnijeti zahtjev za prekid učešća u radu školskog odbora.

DIO TREĆI. JAVNOST RADA

Član 9.

(Uslovi za obezbjeđivanje javnosti rada)

- (1) Rad školskog odbora je javan.
- (2) Školski odbor obezbjeđuje javnost rada blagovremenim, potpunim i objektivnim informisanjem o svom radu.
- (3) Sekretar škole u saradnji sa direktorom stara se da se u prostoriji za održavanje sjednica školskog odbora obezbijede mjesta za članove školskog odbora i pozvana lica.

Član 10.

(Oglasna ploča)

- (1) Dnevni red sa zakazanim datumom održavanja sjednice školskog odbora obavezno se postavlja na oglasnu ploču škole.
- (2) Odluke, zaključci i stavovi školskog odbora se objavljuju javno, putem oglasne ploče, odmah, a najkasnije tri dana nakon okončanja sjednice na kojoj su doneseni.
- (3) U slučaju da je školski odbor odluku, odnosno zaključak, donio na pisani zahtjev trećeg lica, iste je obavezan dostaviti u pisanoj formi podnosiocu zahtjeva.

DIO ČETVRTI. NADLEŽNOSTI ŠKOLSKOG ODBORA

Član 11.

(Nadležnost školskog odbora u donošenju akata)

- (1) Školski odbor osigurava djelotvorno i efikasno korištenje svih resursa škole i brine o zakonitom radu škole i njenih organa.
- (2) Predsjednik i članovi školskog odbora odgovorni su za zakonitost rada školskog odbora.
- (3) Nadležnosti školskog odbora u donošenju akata škole su:
 - a) donošenje pravila škole;
 - b) donošenje godišnjeg programa rada škole za tekuću godinu i izvještaja o realizaciji godišnjeg programa rada za prethodnu godinu;
 - c) donošenje finansijskog plana i usvajanje godišnjeg obračuna;
 - d) donošenje općeg akta o unutrašnjoj organizaciji i sistematizaciji radnih mjesta i drugih općih akata u skladu sa pozitivno pravnim propisima;
 - e) donošenje programa rada i izvještaja o radu koji se podnosi osnivaču.

Član 12.

(Rješavanje u prvom i drugom stepenu)

- (1) Školski odbor je nadležan za rješavanje o:
 - a) izboru, imenovanju i razrješenju direktora i pomoćnika direktora/voditelj dijela

nastavnog procesa, kao i zaključivanju ugovora o radu i prestanku rada direktora škole u skladu sa pravilnikom koji donosi ministar/ica;

b) Imenovanju komisija u skladu sa pozitivno-pravnim propisima;

c) korištenju sredstava preko iznosa određenog pozitivno-pravnim propisima;

d) žalbi učenika, odnosno roditelja učenika na rješenje o izricanju odgojno-disciplinske mjere iz člana 94. stav (2) tačke d), e), f) i g) Zakona o odgoju i obrazovanju u osnovnoj i srednjoj školi u Kantonu Sarajevo („Službene novine Kantona Sarajevo” br. 27/24);

e) žalbama i prigovorima kandidata po javnom konkursu za prijem radnika;

f) žalbama i prigovorima koji se odnose na rad direktora škole.

(2) Školski odbor je nadležan za odlučivanje u drugom stepenu na odluke direktora škole na koje je dopuštena žalba ili prigovor.

Član 13.

(Ostali poslovi)

Školski odbor obavlja i slijedeće:

a) razmatra prijedloge odluka, preporuke i prijedloge koje se upute školskom odboru i preuzima odgovarajuće mjere,

b) rješava sva pitanja odnosa s osnivačem,

c) u prvom stepenu razmatra i odlučuje o pitanjima radnopravnog statusa direktora škole;

d) prati, ocjenjuje i kontrolira rad direktora škole,

e) u vanrednim situacijama kada je direktor privremeno spriječen da obavlja poslove iz nadležnosti direktora, uz saglasnost Ministarstva, ovlašćuje nastavnika ili stručnog saradnika koji ispunjava uslove za direktora koji će, pored svojih poslova, obavljati i poslove i radne zadatke direktora, sve dok traje ta spriječenost;

f) donosi plan kadrovskih potreba škole za petogodišnji period;

g) utvrđuje konačnu listu radnika koji su djelomično ili potpuno ostali bez radnih zadataka;

h) na osnovu saglasnosti Ministarstva, na prijedlog direktora, donosi odluku o raspisivanju konkursa za prijem radnika;

i) na prijedlog direktora donosi odluku o raspisivanju konkursa/oglasa za prijem pripravnika,

j) vrši i druge poslove u skladu sa pozitivno-pravnim propisima i pravilima škole.

DIO PETI. RADNA TIJELA

Član 14.

(Komisije)

(1) U cilju svog efikasnog djelovanja, školski odbor može osnovati povremena radna tijela (komisije) za pripremu razmatranja prijedloga odluka i drugih propisa i akata iz nadležnosti školskog odbora.

(2) Školski odbor prilikom donošenja odluke o imenovanju određene komisije, istoj daje zadatak za pripremu prijedloga koji će se razmatrati na sjednici školskog odbora.

(3) Kod odlučivanja o obavezama radnih komisija ili pojedinaca određuje se ko je izvršitelj, u

kojem roku i na koji način će se izvijestiti članovi školskog odbora o izvršenju obaveze.

Član 15.

(Sastav i mandat komisije)

- (1) Radno tijelo ima predsjednika i dva člana.
- (2) Mandat radnog tijela je ograničen i traje do završetka pripreme određenog prijedloga.
- (3) Predsjednik radnog tijela organizuje rad radnog tijela.
- (4) Radno tijelo radi u sjednicama.

DIO ŠESTI. SJEDNICA ŠKOLSKOG ODBORA

Član 16.

(Način rada školskog odbora)

- (1) Školski odbor i radna tijela rade u sjednicama.
- (2) Sjednice školskog odbora i radnih tijela obilježavaju se rednim brojevima.
- (3) Sjednice školskog odbora održavaju se u pravilu poslije radnog vremena.

Član 17.

(Konstituirajuća sjednica)

- (1) Školski odbor može se konstituisati ako je imenovana većina članova školskog odbora.
- (2) Direktor škole je dužan, najkasnije u roku od 7 dana od dana dostavljanja odluke Vlade o imenovanju školskog odbora, predsjedniku i članovima školskog odbora dostaviti odluku Vlade o imenovanju školskog odbora škole.
- (3) Konstituirajuću sjednicu školskog odbora, najkasnije u roku od 15 dana od dana dostavljanja odluke Vlade o imenovanju školskog odbora škole, saziva predsjednik starog saziva školskog odbora ili njegov zamjenik. U nemogućnosti da predsjednik ili zamjenik starog saziva školskog odbora sazove konstituirajuću sjednicu, istu saziva Ministarstvo.
- (4) Ostale sjednice školskog odbora zakazuje predsjednik školskog odbora, a u slučajevima kada je predsjednik odsutan, sastanke zakazuje njegov zamjenik.
- (5) Predsjednik školskog odbora saziva sjednicu po vlastitoj inicijativi, a dužan ju je sazvati na zahtjev direktora škole.

Član 18.

(Pripremanje sjednice)

- (1) Sjednice priprema predsjednik.
- (2) Materijale za sjednicu školskog odbora, po utvrđenom dnevnom redu, priprema direktor škole koji je u obavezi osigurati potpis sekretara škole u gornjem desnom uglu akta (materijal koji se razmatra), a kojim se potvrđuje da je predloženi materijal u skladu sa pozitivnim zakonskim propisima.
- (3) Ukoliko sekretar škole nije parafirao akt, materijal se ne može razmatrati na toj sjednici.
- (4) Sjednice se trebaju pripremati tako da se rad na sjednici odvija učinkovito i ekonomično, a odluke donesu pravodobno i u skladu sa propisima i općim aktima škole.

Član 19.

(Pozivanje)

- (1) Poziv za sjednicu školskog odbora se upućuje članovima školskog odbora najmanje 2 dana

prije dana određenog za održavanje sjednice.

(2) U hitnim slučajevima, sjednice školskog odbora mogu biti zakazane putem telefona ili na drugi adekvatan način.

(3) Odluku o potrebi hitnog sazivanja sjednice donosi predsjednik ili njegov zamjenik, a na prijedlog sljedećih struktura:

- a) direktor škole;
- b) najmanje dva člana školskog odbora;
- c) Ministarstvo;
- d) Grad/Općina;
- e) Vijeće roditelja;
- f) Sindikalni odbor; i
- g) druge zainteresirane strukture.

(4) Predsjednik školskog odbora ili njegov zamjenik obavezan je odmah zakazati sjednicu školskog odbora kada su u pitanju hitni razlozi, a najkasnije u roku od sedam dana, te u dnevni red uvrstiti pitanja koja delegiraju strukture navedene u stavu (3) ovog člana.

Član 20.

(Dnevni red)

(1) Članovima školskog najmanje dva dana prije održavanja sjednice dostavlja se poziv i prijedlog dnevnog reda, pisani materijali u vezi sa tačkama dnevnog reda koji će se razmatrati na sjednici i zapisnik sa prethodne sjednice.

(2) Prijedlog dnevnog reda sjednice školskog odbora predlaže predsjednik školskog odbora, a konačan dnevni red utvrđuje školski odbor.

(3) Redovna tačka dnevnog reda je usvajanje zapisnika i izvještaj o realizaciji zaključaka sa prethodne sjednice.

(4) U pripremanju prijedloga dnevnog reda za sjednicu treba voditi računa o slijedećem:

- da se prvenstveno u dnevni red unesu pitanja koja su u vrijeme pripremanja sjednice najvažnija i najbitnija za rad škole,

- da dnevni red ne bude preopsežan,

- da predmeti o kojima će se raspravljati i odlučivati na sjednici budu obrađeni, potkrijepljeni podacima i obrazloženi tako da se članovi mogu upoznati s predmetom i o njemu raspravljati i odlučivati na istoj sjednici.

Član 21.

(Učešće stručnih lica u radu školskog odbora)

(1) Prisustvo sjednici školskog odbora je obavezno za radnika škole odnosno lice koje je ovlašteno da obavlja određene poslove za školu, čije prisustvo sastanku zahtjeva školski odbor u slučajevima kada se traži njihovo stručno mišljenje ili ako moraju da daju dodatno objašnjenje za određeno pitanje koje se razmatra na sjednici. Prisustvo sjednicama dozvoljeno je samo licima kojima je školski odbor odobrio prisustvo.

(2) Školski odbor je obavezan blagovremeno pisanim putem obavijestiti sindikalnog povjerenika o sjednicama i omogućiti mu prisustvo svim sjednicama, osim sjednicama koje

su zatvorene za javnost, te razmotriti prijedloge i stavove Sindikata o pitanjima iz njegove nadležnosti, ako se o njima raspravlja.

Član 22.

(Učešće sekretara škole u radu školskog odbora)

- (1) Na svakoj sjednici školskog odbora sekretar vodi zapisnik, ali nema pravo odlučivanja.
- (2) Učešće sekretara škole u raspravi je dopušteno uz odobrenje predsjednika školskog odbora.
- (3) Ukoliko sekretar škole smatra da određeni materijal nije usklađen sa pozitivnim zakonskim propisima, obavezan je direktoru, školskom odboru i Ministarstvu dostaviti obrazložen pisani akt o uočenim nepravilnostima na dalje postupanje.
- (4) Sekretar škole je dužan pisanim putem upozoriti školski odbor na nezakonito postupanje školskog odbora, direktora škole ili drugog radnika škole, ukoliko je takav postupaku vezi sa propisanim dužnostima školskog odbora.

Član 22.

(Tok sjednice)

- (1) Sjednicom školskog odbora predsjedava predsjednik, a u njegovoj odsutnosti zamjenik predsjednika.
- (2) Prije predlaganja dnevnog reda predsjednik utvrđuje da li postoji kvorum za rad predviđen Poslovníkom i o tome obavještava školski odbor.
- (3) Nakon što se utvrdi da postoji kvorum za rad sjednice, predsjednik školskog odbora, otvara sjednicu i predlaže dnevni red.
- (4) O predloženom dnevnom redu predsjednik školskog odbora po potrebi daje objašnjenje.
- (5) Poslije usvajanja dnevnog reda prelazi se na razmatranje pojedinih pitanja po utvrđenom dnevnom redu.
- (6) Član školskog odbora, odnosno učesnik na sjednici školskog odbora može govoriti pošto zatraži i dobije riječ od predsjednika školskog odbora.
- (7) Predsjednik školskog odbora daje riječ članovima školskog odbora po redu kojim su se prijavili.
- (8) Izvan reda prijavljivanja predsjednik će dati riječ izvjestiocu o određenoj tački dnevnog reda ako on to zatraži zbog dopunskog objašnjenja pojedinog predmeta.

Član 23.

(Obrazlaganje materijala)

- (1) Materijale na sjednici obrazlaže direktor ili osoba koja je materijal pripremila, odnosno na koju se materijal odnosi.
- (2) Kada su članovima dostavljeni materijali za sjednicu na osnovu kojih se donosi određeni opći ili pojedinačni akt, izvjestilac je dužan samo kratko iznijeti sadržaj materijala, odnosno predloženih akata.

Član 24.

(Pridržavanje dnevnog reda)

- (1) Član školskog odbora, odnosno učesnik u raspravi može da govori samo o pitanjima o

kojima se raspravlja po utvrđenom dnevnom redu.

(2) Ako se udalji od dnevnog reda, predsjednik školskog odbora će ga upozoriti da se pridržava dnevnog reda.

(3) Ako se član školskog odbora, odnosno učesnik u raspravi ni poslije upozorenja ne drži dnevnog reda, predsjednik školskog odbora je ovlašten uskratiti mu dalje sudjelovanje u raspravi o toj tački dnevnog reda.

Član 25.

(Učešće u raspravi)

(1) Član školskog odbora, odnosno učesnik u raspravi može u pravilu da govori samo jedanput o istom pitanju.

(2) Izuzetno predsjednik školskog odbora može odobriti članu školskog odbora, odnosno učesniku u raspravi da govori po drugi put o istom pitanju najduže do 5 minuta.

(3) Pravo na ponovno sudjelovanje u raspravi učesnik ima tek nakon što završe s izlaganjem osobe koje su se prvi put prijavile i dobile riječ.

Član 26.

(Obilježje izlaganja na sjednici)

(1) Učesnik u raspravi dužan je govoriti kratko i jasno i iznositi prijedloge za rješavanje predmeta o kojima se raspravlja.

(2) Predsjednik je dužan omogućiti da učesnika u raspravi niko ne smeta za vrijeme njegovog izlaganja.

Član 27.

(Prekid rasprave)

Na prijedlog predsjednika ili drugog člana školski odbor može odlučiti da se rasprava o pojedinom predmetu prekine i da se predmet ponovno prouči ili dopuni, odnosno da se pribave dodatni podaci za iduću sjednicu.

Član 28.

(Zaključivanje rasprave)

(1) Rasprava o pojedinoj tački dnevnog reda traje sve dok prijavljeni učesnici u raspravi ne završe svoja izlaganja.

(2) Kada predsjednik potvrdi da više nema prijavljenih učesnika u raspravi o određenom predmetu, zaključit će raspravu.

(3) Na prijedlog predsjednika ili drugog člana školskog odbora može se odlučiti da se rasprava o pojedinom predmetu zaključi i prije nego što svi prijavljeni dobiju riječ, ako je predmet dovoljno razmotren i o njemu se može validno odlučiti.

Član 29.

(Održavanje reda na sjednici)

(1) Predsjednik ima isključivo pravo u održavanju reda na sjednicama.

(2) Svakoj osobi koja sudjeluje u radu na sjednici, ako se ne pridržava reda ili ne poštuje odredbe ovog poslovnika, mogu se izreći kaznene mjere:

- opomena

- oduzimanje riječi
- udaljavanje sa sjednice

Član 30.

(Opomena)

- (1) Opomena se izriče članu školskog odbora koji na sjednici svojim ponašanjem ili izlaganjem narušava red i odredbe ovog poslovnika.
- (2) Opomenu izriče predsjednik.

Član 31.

(Oduzimanje riječi)

- (1) Mjera oduzimanja riječi izriče se osobi koja svojim ponašanjem, izjavama ili nepoštivanjem odredaba ovog poslovnika remeti rad sjednice, a već prije toga joj je na istoj sjednici izrečena opomena.
- (2) Mjeru oduzimanja riječi izriče predsjednik.

Član 32.

(Udaljavanje sa sjednice)

- (1) Mjera udaljavanja sa sjednice izriče se osobi koja ne postupa prema nalogu predsjednika, a kojoj je ranije izrečena mjera oduzimanja riječi ili koja na drugi način toliko narušava red i krši odredbe ovog poslovnika da dovodi u pitanje daljnje održavanje sjednice.
- (2) Mjeru udaljavanja sa sjednice, na prijedlog predsjednika, izriče školski odbor.
- (3) Osoba kojoj je izrečena mjera udaljavanja sa sjednice, dužna je odmah napustiti prostor u kojem se održava sjednica.
- (4) Udaljavanje sa sjednice odnosi se samo na sjednicu na kojoj je ova mjera izrečena.

Član 33.

(Odlaganje sjednice)

- (1) Sjednica će se odložiti kada nastupe okolnosti koje onemogućuju održavanje sjednice u zakazano vrijeme.
- (2) Sjednica će se odložiti i kada se prije započinjanja sjednice utvrdi da na sjednici nije prisutan potreban broj članova.
- (3) Sjednicu odlaže predsjedavajući sjednice.

Član 34.

(Prekid sjednice)

- (1) Sjednica se može prekinuti:
 - kada se tokom sjednice broj prisutnih članova smanji ispod broja potrebnog za održavanje sjednice,
 - kada dođe do težeg remećenja reda na sjednici, a predsjednik nije u mogućnosti održati red primjenom mjera iz člana 29. ovog Poslovnika,
 - kada o pojedinom predmetu treba pribaviti dodatne podatke, isprave ili obaviti konsultacije.
- (2) Sjednicu prekida predsjedavajući sjednice.
- (3) Ako pojedini član smatra da nema razloga za prekid sjednice, on može predložiti da se

sjednica nastavi.

(4) Odluku o nastavku sjednice prema stavu (3) ovog člana donosi školski odbor.

Član 35.

(Zakazivanje nastavka sjednice)

Kada je sjednica odložena ili prekinuta, predsjednik izvještava članove o novom vremenu održavanja sjednice.

Član 36.

(Odlučivanje)

- (1) Nakon završene rasprave o pojedinoj tački dnevnog reda u skladu sa članom 28. ovog Poslovnika pristupa se odlučivanju.
- (2) Prije glasanja predsjednik oblikuje prijedlog odluke, rješenja ili zaključka koji se treba donijeti u vezi s pojedinom tačkom dnevnog reda.
- (3) Odluka treba da bude tako formulisana da tačno, jasno i najsažetije izražava stavove školskog odbora. Istovremeno sa donošenjem odluke se utvrđuje ko treba da je izvrši i u kom vremenskom roku.
- (4) Ako je u pitanju odluka koju treba da izvrši komisija školski odbor će dati smjernice za izvršenje i rad kao i vremenski okvir.

Član 37.

(Način odlučivanja)

- (1) Školski odbor odlučuje javnim glasanjem osim kada je zakonom ili predhodnom odlukom školskog odbora određeno da se o pojedinom predmetu glasa tajno.
- (2) Članovi glasaju javno tako da se dizanjem ruke izjašnjavaju za ili protiv prijedloga odluke, rješenja ili zaključka.
- (3) Član školskog odbora koji se ne slaže sa donesenom odlukom može tražiti da se u zapisnik unese njegovo izdvojeno mišljenje.
- (4) Članovi glasaju tajno tako da na glasačkom listiću na kojem je ispisano „za“ i „protiv“ vrše zaokruživanje odnosno zaokruže redni broj ispred osobe ili prijedloga akta za koji glasaju.

Član 38.

(Donošenje odluka - kvorum)

- (1) Odluke Školskog odbora valjane su ako za njih glasa većina od ukupnog broja članova.
- (2) Rezultate glasanja utvrđuje predsjednik Školskog odbora.
- (3) Na osnovu rezultata glasanja predsjednik sjednice objavljuje je li određeni prijedlog usvojen ili odbijen.
- (4) U slučaju da članovi školskog odbora prilikom donošenja odluka (glasanja), koje su neophodne za funkcionisanje škole, odnosno kojima se onemogućava rad škole, dva puta glasaju 2:2 ili da prilikom glasanja ne postoji većina od ukupnog broja članova, školski odbor je dužan dostaviti Ministarstvu obrazloženje o nedonošenju navedenih odluka sa dokazima o postupanju po istom.

Član 39.

(Zaključivanje sjednice)

Nakon što je iscrpljen dnevni red i svi predmeti predviđeni dnevnim redom raspravljani i o njima odlučeno, predsjednik zaključuje sjednicu.

DIO SEDMI. ZAPISNIK

Član 40.

(Vođenje zapisnika)

- (1) Na svakoj sjednici školskog odbora vodi se zapisnik.
- (1) Zapisnik se vodi u elektronskom obliku i obaveznoj štampanoj verziji na papiru formata A4.
- (2) Svaka stranica zapisnika se numeriše.
- (3) Zapisnik vodi sekretar škole, a u slučaju da je sekretar škole spriječen, zapisnik vodi predstavnik radnika u školskom odboru, a isti na sljedećoj sjednici parafira sekretar škole, kojom prilikom ima mogućnost primjene mehanizma iz člana 18. stav (2) ovog Poslovnika,
- (4) Za uredno vođenje zapisnika odgovoran je sekretar škole i predsjednik školskog odbora. Član 41.

(Sadržaj zapisnika)

- (1) Zapisnik ima obilježje isprave kojom se potvrđuje rad i oblik rada Školskog odbora.
 - redni broj sjednice,
 - vrijeme, mjesto i datum održavanja sjednice,
 - ime i prezime predsjedavajućeg i zapisničara broj prisutnih članova i njihova imena,
 - imena odsustnih članova koji su opravdali svoj izostanak i članova koji nisu opravdali svoj izostanak,
 - imena drugih lica prisutnih na sjednici koji nisu članovi Školskog odbora, njihovo zvanje i funkcija,
 - konstatacija da sjednici prisustvuje potreban broj članova za punovažno odlučivanje,
 - predloženi i usvojeni dnevni red,
 - imena podnosioca izvještaja i sumirani podaci o izvještaju,
 - imena učesnika u raspravi,
 - formulacija odluke o kojoj se glasalo,
 - odluke i zaključke po pojedinim tačkama dnevnog reda sa naznačenim brojem glasova „za“ i „protiv“,
 - brojem uzdržanih glasova i izdvojenim mišljenjem, vrijeme zaključivanja ili prekida sjednice,
 - potpis predsjednika odnosno predsjedavajućeg i zapisničara.

Član 42.

(Izmjene i dopune zapisnika)

- (1) Izmjene i dopune zapisnika vrše se samo odlukom školskog odbora prilikom njegovog usvajanja.
- (2) Nije dopušteno zapisnik uništiti ili ga zamijeniti novim.

Član 43.

(Potpisivanje zapisnika)

Zapisnik i svaku stranicu zapisnika potpisuje predsjednik školskog odbora, odnosno predsjedavajući sjednice, kao i lice koje vodi zapisnik.

Član 44.

(Skraćeni zapisnik)

- (1) Odluke, rješenja i zaključci sa sjednice školskog odbora mogu se objaviti u obliku skraćenog zapisnika.
- (2) O objavljivanju skraćenog zapisnika brinu se predsjednik i direktor škole.

Član 45.

(Uvid u zapisnik)

- (1) Svakom radniku koji je prema zakonu pokrenuo postupak zaštite stečenih prava, direktor mora na njegov zahtjev omogućiti uvid u dio zapisnika sa sjednice koji se odnosi na zaštitu tih prava.
- (2) Izvodi, prepisi i kopije zapisnika mogu se davati pravosudnim i upravnim organima izvan Škole samo na njihov zahtjev.
- (3) Zapisnici Školskog odbora se čuvaju u skladu s propisima koji se odnose na zaštitu arhivske građe.

DIO OSMI. PRIJELAZNE I ZAVRŠNE ODREDBE

Član 46.

(Stupanje na snagu)

Ovaj Poslovnik stupa na snagu danom donošenja.

Član 47.

(Prestanak važenja prethodnog poslovnika)

Danom stupanja na snagu ovog Poslovnika prestaje da važi Poslovnik o radu Školskog odbora br.01-1-1019-4/25 od 06.11.2025.godine.

Dj.broj:01-1-511/26

U Sarajevu, 30.03.2026. godine



Predsjednik školskog odbora

Elvis Turković